

VIOLETTE AILHAUD

Samenaire de vidas

Revirat dau francés per

DANIEL DAUMÀS

Prefaci

Lo Saule Mort, lo 19 de junh de 1919.

Me decideri de contar çò que siguet après l'ivern de 1852 que, per lo segond còp en manco setanta ans, nòstre pichon païs ven de perdre mai tótei seis òmes. Tótei. Lo darnier es estat tuat lo jorn de l'Armistice, lo 11 de novembre passat.

Per nautrei, lei fremas, li a ges de victòri, que vuege. E mei lagremas se mesclon an' aquelei de tótei lei fremas alemandas e francesas que viron dins son ostau sensa òme. Me plori per aquéstei braçs perduts fach per nos abraçar, per devirar la fedat quora lo fau tondre. Me plori per aquéstei mans esvalidas fachas per nos caressar e manejar lo dalh. Aviáu sege ans en 1851 e uechanta-quatre uei. A cada còp la République nos seguet nòstreichs òmes coma se sega lo blat. Un travalh ben fach. Nòstrei ventres, nòstrei terras an plus porgit de recordas. A tant raubar d'òmes que la semença a mancat.

Listòri que conti au sera de ma vida, se's debanada tota en provençau. A n'aqueu temps d'aquí aviam ges d'autra lenga qu'aquesta qu'aviam apressa de nòstrei parents : lo parlar provençau. Lo patois dien lei mariàs. Es ma lenga mairala e saludi sa resistenci.

Pasmens feri la chausida d'escriure nòstra istòri en francés per que mon testimòni s'alargue en defòra de Provença. Es que pereu, m'agrada aquesta segonda lenga. L'ai apressa, l'ai facha miuna coma una segonda patrie, l'ai apressa ai dròlles. Es aquela de la République que nòstreis òmes li an donat sa vida dau còp. E nautrei, lei fremas, tot de lòng de nòstra vida.

Violette Ailhaud

1

Aquò venguet dau fons de la comba. Tre que passet la gafa, que l'ombra aguet escafat lei belugas de l'aiga tras leis isclas, se veguet qu'era un òme. Nòstra natura de femnas sensa espós se metet a brandilhar. Nòstrei braçs s'arreston d'amolonar le fen. Se regardam e caduna se soven dau jurament. S'aganton nòstrei mans e se sarron a ne'n far petar lei jonchas. S'alarga nòstre pantais, esfrai deliciós entre paur e desideri.

L'òme monta. Avança a béleis encambadas. Pasmens sembla que ven d'aise-d'aise. Anar dolosament lent per nòstrei nervis tremolants. Per negar aqueu temps que nous gassinha coma un mau de dent, se mandam mai dins lo travalh. Forcas e rasteus dançon lo brandi. Lei braçs se bolegon solets, de son sicap e creisson leu-leu lei molons de fen.

Mai lei testas se penson qu'a n'una cauva : l'òme.

Cada còp qu'es estat escondut per un monteu, me siáu demandada se non pantaiavi. Ò bessai que se's pas sentut de contunhar. Me viri devèrs moi companhas : liegi sus sei caras una angoeissa qu'es pereu miuna. Aquò es longàs. Mancam d'aire, auvissem au dintre una plancha que s'esperlonga. S'eriam acostumadas a n'aquela espera, seguras que vendriá, fisançosas. E ara aquel òme que monta desvaria nòstra santa paciencia e fa dei canhas jaçudas qu'eriam, de lobas qu'an lo ruscle.

Despuei mai de dos ans, avem manco vist un òme. Lei darniers, lei nòstreis, an partit en fevrier de 1852, agantats per lei gendarmes que lei secutavon emé son fusiu. Aquéltei de l'emperi noveu de Louis Napoléon Bonaparte, estranglaire de la segonda Republica que n'era estat lo president.

Eron tot beu just partits, que feron petar dins lo valat dau Devens. Martin e son amic

Antòni Joan son estats tuats. Avián cercat de s'escapar. Qu'an dich. Lo miu paire es mòrt puei ais isclas dau Salut, condemnat a perpetuïtat a la trasportacion ai galeras de Cayenne. Era un chefe, dangeirós per leis assassins de la Republica qu'avián decidit de matrassar aquélei que la defendián. Leis autrei eron estats forabandits en Argeriá. Tot aquò e la mòrt de mon paure paire va saupriam que fòrça mai tardi, quora lei promiers faidits torneron d'Argeriá.

Martin. Mon amorós, mon promés. Aviáu just sege ans e miech quora la mauparada nos calet sus. Eu n'aviá dez-e-uech. Quant de còps lo bostiguéri per li far veire que lo voliáu... Un còp, un solet còp li laisseri calinhar mei possas de femna lesta per l'amor, lesta per se gonflar d'enfants.

N'eriam au 20 de desembre 1851, per la sant Joan d'ivern que marca la fin dei jorns pichinets. Lo sera danseriam a l'entorn dau fuec maugrat lo tristum. Aquest jorn d'aquí, mon paure paire qu'era lo nòstre promier consol, aviá refusar d'organisar la votacion

ordenada per l'emperaire noveu per nos far acceptar son marrit còp. Tot lo monde eriam enmaliciat còntra lo prince qu'aviá fach estampar que de bilhetas "OUI".

Leis òmes, revenguts dei Meas, de la batesta ganhada còntra lo batalhon dau 14en leugier eron aquí. Nafrats, desesperats, la paur au ventre. Per oblidar, Martin aviá begut, fòrça begut. Sabiam pas de que sariá fach l'endeman, mai redobtavi lo temps marrit que veniá, va sabiam tótei. Aviáu decidit de li mostrar mon amor, mon desideri. Dins la feniera de son paire onte l'aviáu menat, prengueri sa boca emé la miuna. Sentiá lo vin. M'agradet lo gost d'aquel òme.

Martin e Antòni Joan son leis solets òmes qu'avem gardat. Dos còs d'òmes joves qu'avem sepelits sota leis codols aquí onte leis avem trovats.